

# «Nus essan pertscherts da la concorrenza»

Grischun: Candidatura gieus olimpics d'enviern 2026

DA GION NUTEGN STGIER / ANR

■ **Quella schanza haja il Grischun da nizzegiar per sa preschentar cun in grond project sin il champ internaziunal. Da quella opiniun è il comité che stat davos quella visiun da realisar en diesch onns ils gieus olimpics d'enviern en noss chantun.** Ils promoturs per quel project mundial èn ids ier ad aut, en in lieu che ha ina giada er cumenzà cun ina visiun. Beneventà ils represchentanants da las medias ha *Thomas Domenig*, senior, e quai sin il tetg da l'hotel «City West» a Cuira, ditg auter, aut sur la chapitala grischuna. La candidatura per eventualmain organisar l'olimpiada d'enviern en diesch onns saja in project chantunal, ha ditg *Domenig senior*. Il Grischun haja da daventar pli activ, crair a visiuns e lura er realisar quellas. Grazia a la sia visiun saja er stà pussaivel, da ses temp, da realisar la surbajegiada «City West». En ils lieus turistics da noss chantun saja avant maun ina buna infrastruttura e gist quel aspect saja da gronda impurtanza per candidar per quel event da sport global, ha punctuà l'interprendider da Cuira.

## Modernisaziun dal traffic public

Al comité per gieus olimpics 2026 en noss chantun appartegna er cusseglier dals chantuns *Stefan Engler*. Quella occurrenza vegnia a dar al Grischun in grond stausch tar il svilup economic dal Grischun. Ultra da quai saja ina modernisaziun da l'infrastructura tar il traffic public sco er tar la telecommunicaziun in auter aspect fitg positiv da gieus olimpics d'enviern en diesch onns en il Grischun. *Engler* vesa lura er intgins avantatgs cun



Il comité grischun per gieus olimpics 2026 en noss chantun: *Thomas Domenig, senior, Stefan Engler, Ruedi Weber, Karin Niederberger, Ariane Ehrat, Tarzisius Caviezel e Jürg Michel (da san.)*

FOTO G. N. STGIER

decider il suveran grischun en duas votaziuns per quel event da sport da renum mundial. Ina giada, il favrer 2017, decidian votants e votantas sch'il Grischun duai insumma candidar e lura il 2018 per la candidatura uffiziala.

## Semnar per racoltar

Fieu e flomma per la candidatura grischuna è lura er *Tarzisius Caviezel*, il

landamma da Tavau. La candidatura grischuna haja bunas schanzas er cun esser ella persistenta. Da quella occurrenza da sport profitesch tut las regiuns da noss chantun er cun avair lieu en divers lieus las differentas disciplinas da sport tar ils gieus olimpics 2026 en il Grischun. «Nus essan pertscherts da la concorrenza», ha punctuà *Caviezel*. Quai saja ina giada la candidatura da la Romandie, pli proba-

bel quella dad Innsbruck ed er quella da Vancouver. Per racoltar saja l'emprim da semnar e perquai saja ina candidatura grischuna indispensabla.

## In «GEA» per noss uffants

*Karin Niederberger*, la presidenta da l'Uniuin svizra dals giudladers, è da l'opiniun ch'ils Grischuns hajan la forza, la visiun

ed er l'abilitad dad organisar gieus olimpics d'enviern. In «GEA» a quella candidatura saja er in confess tar ils uffants, els che duajan er en il futur avair la pussaivladad da viver lur semis. Ils Grischuns hajan da nizzegiar quella raschun da sa mussar a l'entir mund e da confermar dad esser buns ospitants.

## Esser preschents sin la carta turistica mundiala

D'organisar ils gieus olimpics d'enviern il 2026 saja segir ina gronda sfida per tuts, ha menziunà *Ariane Ehrat*, la diretura da l'organisaziun turistica Engiadina San Murezzan. Il sport saja in element impurtant en nossa societad, el saja qualitad da viver e da sa chattar bain. *Ehrat* è cunzunt persvasa che cun avair lieu las duas proximas olimpiadas d'enviern en l'Asia saja la schanza dal Grischun gronda da pudair organisar en diesch onns quel event. «Nus avain urgent dad esser preschents sin la carta turistica mundiala», ha ditg la dunna da Turissem Engiadina San Murezzan.

## Er ina chausa emoziunala

Senza il sport fiss il mund trist, ha ditg *Ruedi Weber*, il sportist paralisa e participant da gieus paralimpics d'enviern. Ils gieus olimpics sajan er ina chausa emoziunala, quai conuscha er grazia a las numerusas participaziuns a quel event sportiv. El è er persvas ch'il Grischun organisass ils gieus olimpics d'enviern e quai cun bler engaschament e cunzunt cun bler cor. Nus avain cunzunt er dad avair dapli confidenza en sasez e lura è la candidatura bunamain segira, manegia *Weber*.